

გამარჯვება მუდამ შეიძლება

თბილისი. “ლოკომოტივის” სტადიონი.; 15 ივნისი.

“დინამო” (თბილისი) – “დინამო” (მოსკოვი) 2:0 (2:0).

თბილისი: გაგომიძე, ძოძუაშვილი, ჭელიძე, ებრალიძე, ხინჩაგაშვილი (მუჯირი), გავაშელი, მ. მაჩაიძე, ასათიანი, ქანთარია, გ. მაჩაიძე (მჭედლიშვილი), წერეთელი.

მოსკოვი: პილგუი, ბასალაევი (ტერეხოვი), ნიკულინი, კომაროვი, დოლბონოსოვი, დოლმატოვი, ბაიდაჩნი, პეტრუშინი (პუდიშევი), პავლენკო, გავრილოვი, ევრიუჟიხინი.

მსაჯი: ტ. ბახრამოვი (ბაქო).

გაფრთხილებები მიიღეს გ. მაჩაიძემ და ბაიდაჩნიმ.

როცა სამსაჯო ოთხში ორივე გუნდის წარმომადგენლებმა თამაშის ოქმი შეავსეს, მოსკოველთა უფროსმა მწვრთნელმა გ. კაჩალინმა საკმაოდ არაორაზროვნად ჩაილაპარაკა: ჰმ... ჰმ...

ეს “ჰმ... ჰმ...” გამოცდილ სპეციალისტს თბილისის “დინამოს” შემადგენლობის გაცნობისას აღმოხდა. ვინ–ვინ და კაჩალინი კი კარგად იცნობს ჩვენს გუნდს, იცის თითოეული მოთამაშის ფასი და, რა თქმა უნდა, როცა მოწინააღმდეგის რიგებში ვერ ნახა გოგინას, ხურცილავას, კანთელაძის, გუცაევის, ყიფიანის, რეხვიაშვილის, ესე იგი, ძირითადი შემადგენლობის 50 პროცენტზე მეტის გვარები, მატჩის მოგების პერსპექტივები ალბათ უფრო რეალურ ტონებში წარმოესახა. დაუმატეთ ამას, რომ თვით თამაშის მსვლელობაში, 25–ე წუთზე, ტრავმის გამო მინდორი დატოვა ხინჩაგაშვილმაც...

გადავხედოთ ახლა მოსკოველთა შემადგენლობას. ვინ აკლდა მათ? ფაქტიურად მხოლოდ ცენტრალური თავდასხმელი კოჟემიაკინი. დანარჩენი ყველა ადგილზე იყო, სათადარიგოთა სიაში კი ისეთი ფეხბურთელების გვარებსაც შეხვდებოდით, როგორც არიან მახოვიკოვი, კოზლოვი, პუდიშევი.

ერთი სიტყვით, ორი მეტრძოლი მხარე მინდორზე გამოვიდა აშკარად უთანაბრო “მატერიალური აღჭურვილობით”. თუ ამას დავუმატებთ იმ კრიზისულ მდგომარეობას, რომელშიც ახლა თბილისის “დინამოა”, მატჩის შედეგის პროგნოზისთვის სულაც არ იყო საჭირო სპეციალური გამომთვლელი მანქანა. ყველაფერი თითქოს ისედაც ცხადი და ნათელი გახლდათ.

მაგრამ გამარჯვება მუდამ შეიძლება, მაშინაც კი, როცა ასეთ კრიტიკულ სიტუაციაში ხარ და თითქოს წინასწარვე გადაწურული წარმატების ყოველგვარი იმედი. ოღონდ საამისოდ საჭიროა ძალების სრული მობილიზება, მთელი მონდომებით ბრძოლა, ნამდვილი სპორტული თავგანწირვა, ესე იგი, ყველაფერი ის, რაც გააკეთეს მინდორზე თბილისელმა ფეხბურთელებმა.

შეიძლება ზოგიერთმა ფეხბურთის მოყვარულმა ამ სტრიქონების წაკითხვისას გვისაყვედუროს: ასეა მუდამ – საკავშირო ჩემპიონატში საქმე მეტი რომ არ შეიძლება ისე ცუდად გვაქვს, ცხრილის ბოლოში ვართ, მდგომარეობა კატასტროფულია, მაგრამ საკმარისია ერთი რაღაც წარმატება და ისევ იწყება მოთამაშეთა ქება, მათი მოკრძალებული ღირსებების გაბუქება ფერადოვანი სიტყვებით...

არა, ქება რა შუაშია! საქებარი, კარგად იცით, ჯერ არაფერი გვაქვს, მაგრამ გვინდა ღრმა რწმენა გამოვთქვათ იმისა, რომ ყველაფერი დაკარგული არაა, რომ დროებითი კრიზისი გაივლის, და თბილისის “დინამო” მთლიანად თუ არა,

ნაწილობრივ მაინც გამოასწორებს მდგომარეობას, კვლავ ირწმუნებს თავის ძალას. რახან მან ასეთი “საავარიო” შემადგენლობით შეძლო თავისი ყველაზე ძნელი მეტოქის დამარცხება, შემდგომში, როცა მწყობრს დაუბრუნდებიან საუკეთესონი, საქმე თანდათან წინ უნდა წავიდეს.

სარეცენზიო წერილი თასის გათამაშების მატჩს ეხება, ჩვენი ფიქრები კი ისევ და ისევ ჩემპიონატს დასტრიალებს, რომლის უახლოეს პერიოდში (დღევანდელი მატჩი ლვოვში და შემდეგ სამი შეხვედრა შინ “შახტიორთნ”, “ნისტრუსთან” და “დნეპრთან”) ბევრი რამ წყდება, თითქმის “ყოფნა–არყოფნის” საკითხი.

მოსკოვის “დინამოსთან” თამაშში თბილისელებს არა ჰქონიათ რომელიმე სუსტი რგოლი, მინდორზე არ იყო მოთამაშე, რომელიც საყვედურს იმსახურებდეს მოუნდომებელი, ინერტული თამაშისთვის. საიმედოდ მოქმედებდა დაცვა, სადაც მთავარი როლი შეასრულა ჭელიძემ, თავისი უშუალო მეტოქის – ევრიუჟიხინის ნეიტრალიზების გარდა ზომიერად, სასარგებლოდ ითამაშა მოძუაშვილმა, ხოლო მუჯირმა კარგად შეავსო დაშავებული ხინჩაგაშვილის ადგილი. ნახევარდაცვაში საუკეთესო იყო ასათიანი, წინა ხაზზე – წერეთელი. გაამართლა იმედი ახალგაზრდა ქანთარიამ.

მოსკოველებმა ყველაფერი სცადეს, რომ თავიდანვე შეექმნათ გამარჯვების გარანტია, მაგრამ მასპინძელთა ორგანიზებულ წინააღმდეგობას წააწყდნენ, შემდეგ კი თბილისელებმა თანდათან გააძლიერეს თამაში და 32-ე წუთზე ქანთარიამ ასათიანისგან მიღებული ბურთი თავს ზემოთ ზუსტად გადაუგდო კარიდან წინდაუხედავად გამოსულ პილგუის – 1:0.

გავიდა ცოტა ხანი, წერეთელმა მარცხენა ფლანგიდან მიაწოდა საჯარიმო კარის წინ, სადაც ადგილზე აღმოჩნდა მ. მაჩაიძე – 2:0.

სტუმრების კონტრშეტევებიდან აღსანიშნავია ის მომენტი, როცა პუდიშევმა ძელს მოახვედრა ბურთი, თბილისელებს კი ანგარიშის გაზრდის არაერთი შესაძლებლობა ჰქონდათ. თასის ორი მატჩის ჯამში კიდევ ერთი გოლი დიდ სამსახურს გაუწევდა ჩვენს გუნდს, მისი გატანა კი შეიძლებოდა.

რ. ქორიძე.

“ლელო”, 18 ივნისი, 1974 წ.